

ကောလောသံ

ကောလောသံ သင်းတော်ဟို့ ပေါလုရဲ့

ပေးစာ

နိဒါန်း

ကောလောသံ သင်းတော်ဟို့ ပေါလုရဲ့ ပေးစာ ဟို့ တမန်တော် ပေါလုဟု ရေးဟူးလေဟယ် (၁.၁)။ သူဟာ အယ်စာဟို့ ခရစ်တော် မွီးဘီးနု ၆၀ ခုနှစ်လော့-က်ဟု ရောမမြို့ မာ ထောန်ကုလနေဒူးခီမာ ရေးဟူးလေဟယ်။ ပေါလုဟာ ကောလောသံ သင်းတော်ဟို့ ပေးဟူစာ၊ ဖေက် သင်းတော်ဟို့ ပေးဟူစာနု ဖိလေမုန်ဟို့ ပေးဟူစာလေဟို့ ထောန်ကုလနေဒူးမာ ရေးဟူးဟူကြောန့် အယ်မူစာလေဟို့ ထောန်ထဲဟု ပေးဟူစာ ဆိုဘီး ခေါ်လေဟယ်။ အယ်မူစာဟာ ကောလောသံမြို့မာရှိဟူ သင်းတော်ဟို့ ရေးဟူစာဖြစ်လေဟယ်။ ၂.၁ မာ ဖော်ပြဟူးတိုင်း ဆိုဟာ ပေါလုဟု ကောလောသံမြို့မာ သင်းတော်ဟို့ စပြုသေးဟု ဘေမဲ့လည်း အယ်သင်းတော်တွပ် တာဝန်လေရှိဟယ် ဆိုဘီး မှတ်ယူလေဟယ်။ ဧပဖြာဟာ ကောလောသံမြို့မာ ရှိနေဂဒဲဟု အယ်သင်းတော်ဟို့ တည်ထောန်ဟူးဇာဖြစ်နိုင်ဟယ်။

ပေါလုဟာ ကောလောသံ သင်းတော်ထဲမာ မှားယွင်းဟူ သွန်သန်ရှင်းလေ ရှိနေဟူကြောန့် ရရာတိုင်း စိုးရိမ်လေဟယ်။ သူဟာ အယ်မူဇာနု ပတ်သက်ဘီး စာလေဘော

င်ဂီး ရေးဟူးလေဟယ်။ အယ်နေရာမာ ယုဒခရစ်ယာန် အောက်စုတစုရှိဘီး သူးနို့လေဟာ တခြား ခရစ်ယာန်လေ ဟို့ ဓမ္မဟောန်းကျမ်းထဲဟု ရေဖျားလှီးရှင်းန ဆိုင်ဟူ ယုဒ ပညတ်လေဟို့ လိုက်နာဟို့တွပ် ကြိုးစားနေဟူ လူလေဖြ စ်ဟယ်။ ပေါလုဟု ဘုရားသခင်အားဖြင့် ခရစ်တော်ဟို့ လတ်ခံရှင်းဟုလွဲဘီး ဖြားဇာလည်း လိုအပ်ဟု ဆိုဘီး ပေါ လုဟု လေးလေးနတ်နတ်ဟူး ရေးဟူးဘီး (၁.၁၅-၂၀) အယ်မျိုးသွန်သန်ချစ်ဟာ လူသားရဲ့ ဆင်ခြင်တုံတရား ဟာ သောင်းဇားဟို့ရဟု ဆိုဇာဟို့ ခြေခံဟူးဟယ် (၂.၈)။

ကြောင်းရာ ကျဉ်းချောက်

၁။ ပေါလုဟာ ကောလောသဲမြို့မာရှိဟူ သင်းတော် ဟို့ နှောက်ဆစ်ရှင်းအားဖြင့် အယ်စာဟို့ စပြုဟူး ဟူကြောင်း (၁.၁-၂)

၂။ သူဟာ ကောလောသဲ သင်းတော်ထဲမာ မှားယွင်းဟူ သွန်သန်ရှင်းလေဟို့ ပုလန်ဖြေရှင်းဟူးဟူ ဇာလေထဲ မာ ခရစ်တော်ရဲ့ ကီးမြတ်ရှင်းကြောင်းဟို့ ရေးဟူး ဟူကြောင်း (၁.၃-၃.၄)

၃။ ပေါလုရဲ့ စာလေဘောင်ဂီးထဲမာ တဝပ်လော့-က် ဟာ ကောန်းဟူခရစ်ယာန် သတ်ရှင်မှုတွပ် ညွှန်ကြား ချစ်လေ ပေးဟူးဟူ စာလေဖြစ်ဟူကြောင်း (၃.၅-၄.၆)

၄။ ပေါလုဟာ နှောက်ဆစ်ဘီးန တခြား သင်းတော်လေ မာလည်း အယ်စာဟို့ ဖတ်ဟို့တွပ် ညွှန်ကြားဘီး နိ

ဂေါင်းချောက်ဟူးဟူကြောင်း (၄.၇-၁၈)

¹ ဘုရားသခင်ရဲ့ လိုတော်အားဖြင့် ယေရှုခရစ်တော်
ရဲ့ တမန်တော်ဖြစ်ဟူ ငါပေါလုန နို့လေရဲ့ညီ တိမော
သေဟာ —

² ကောလောသဲ မြို့မှာရှိဟူ ခရစ်တော်ဟို့ ယောင်
ကြည်ဘီး သစ်စာရှိဟူ သန့်ရှင်းသူ ညီကို မောန့်နှမလေ
နားဟို့ စာရေးလိုက်ပါဟယ်၊

နို့လေရဲ့ဖဖြစ်ဟူ ဘုရားသခင်နားဟု ကျေးဇူးတော်န
ငြိသတ်ရှင်းဟာ နန်းနို့လေမာ ရှိပါစေ။

ကျေးဇူးတော် ချီးမွမ်းဘီး ဆုတောင်းဟူကြောင်း

³ နို့လေဟာ နန်းနို့လေတွပ် ဆုတောင်းဟူခီတိုင်း
မာ သခင်ယေရှုခရစ်တော်ရဲ့ ဖဖြစ်ဟူ ဘုရားသခင်ရဲ့
ကျေးဇူးတော်ဟို့ ချီးမွမ်းဂေ့ပါဟယ်။

⁴ ပြားဖြစ်ကြောနဲ့နဲ့ဆိုဟာ နန်းနို့လေဟာ ယေရှုခရစ်
တော်ဟို့ ယောင်ကြည်ဘီး သန့်ရှင်းသူလေဟို့ ရှစ်ဂေ့ဟူ
ကြောင်းဟို့ ကြားရဟူကြောနဲ့ ဖြစ်ဟယ်။

⁵ အယ်မူယောင်ကြည်ရှင်းန ရှစ်ရှင်းမြစ်တာလေဟာ
နန်းနို့လေတွပ် ကောန်းဂန်ဘောင်မာ သိုဟူးဟူ မျှော်လင့်
ရှင်းအားဖြင့် ဖြစ်ပေါ်လာဘီး အယ်မျှော်လင့်ရှင်းကြောင်း
ဟာ နန်းနို့လေနားဟို့ ရော့-က်လာဟူ ကောန်းမြတ်ဟူ ဒန်း
ကောန်းနဆိုင်ဟူ သမ္မာတရားရဲ့ နှောက်တော်ထွပ်စကား
ဟို့ နန်းနို့လေ ကြားရဂေ့ဘီ။

6 အယ်မူဒန်းကောန်းဟာ တကမ္ဘာလောင်းဟို့ ပုလုံန့် ဘီး တိုးပွားဟူမျိုး အယ်ဒန်းကောန်းဟို့ ကြားနာရဟူ နန်း နို့လေလည်း ဘုရားသခင်ရဲ့ကျေးဇူးတော်ဟို့ မှန်းမှန်ကန်း ကန် သိဟူနေဟုနေစဘီး နန်းနို့ထဲမာလည်း သီးသီးဘီး ဟာ တိုးပွားနေဟယ်။

7 ဘုရားသခင်ရဲ့ ကျေးဇူးတော်ဟို့ နန်းနို့လေဟို့ သန် ပေးဟူသူဟာ နို့လေရဲ့ * ကိုယ်စား ခရစ်တော်ရဲ့ မှုဆောန် ဟူ နို့လေရှစ်ရဟူ ပေဖြဘဲ ဖြစ်ပါဟယ်။ သူဟာ နို့လေရဲ့ ကိုယ်စား သစ်စာရှိရှိန ခရစ်တော်ရဲ့ မှုတော်ဟို့ ထမ်းဆော န်ဟူသူ ဖြစ်ဘီး၊

8 ဝိညာဉ်တော်အားဖြင့်ရရှိဟူ နန်းနို့လေရဲ့ဖြစ်တာကြော န်းဟို့ နို့လေဟို့ သူပြောပြဟယ်။

9 အယ်ကြောန့် နို့လေလည်း နန်းနို့လေဒန်းဟို့ ကြားရ ဟူနေဟုစဘီး မြဲဒမ်းဘဲ ဆုတောင်းဘီးဟာ နန်းနို့လေ ဟာ ဝိညာဉ်တော်ပေးတော်မူဟူ ဉာဏ်ပညာန တတ်သိ နားလည်မှု စောင်လင်ရှင်း အားဖြင့် ဘုရားသခင်ရဲ့ လို တော်ဟို့ သိဟူဉာဏ်နပုလဲဝဘီး၊

10 ကောန်းဟူမှု မျိုးမျိုးဖြစ်ဟူ သီးဟို့သီးဘီးဟာ ဘုရားသခင်ဟို့ သိဟူဉာဏ်န ကီးထွားလာရှင်းအားဖြင့် ရာရာတိုင်းမာ သခင်ဘုရား နှစ်သက်စေဘီး ကိုယ်တော် န ထိုက်ထိုက်တန်တန် သတ်ရှင်ရှော-က်လှမ်းနိုင်ဟို့တွပ်

1:7 ၁.၇ ကော ၄:၁၂: ဖိလေ၂၃ * 1:7 ၁.၇ နို့လေရဲ့၊ တချို့ မူရင်းလတ်ရေးမူလေမာ နန်းနို့လေ၊ ဆိုဘီး ပါရှိဟယ်။

တောန်းလျှော့-က်ဂေဟယ်။

11 နှော့-က်ဘီး နန်းနို့လေဟာ ကိုယ်တော်ရဲ့ ဖောင်းတ
ဂိုး အာနဘော်တော်ဟုနေ ဆင်းသတ်လာဟူ စွမ်းသတ်တိ
ရှိဟူမျှန် အားဖုလဲဇာခံရဘီး သီးခံရှင်း၊ စိရှယ်ရှင်းန ပုလဲ
ဝဘီးဟာ၊

12 နန်းနို့ဟို လန်းရောက်နှိုက်ရှိဟူ သန်ရှင်းသူလေရဲ့ မှီ
တော်မာ ပါဝမ်ထိုက်ဟူသူ ဖြစ်စေတော်မူဟူ ဖဘုရားသခ
င်ဟို ဝန်းသာဟူ စိန် ကျေးဇူးတော်ဟို ချီးမွမ်းဂေပါ။†

13 ဖဘုရားသခင်ဟာ နို့လေဟို မှောန်မိုက်ရဲ့တဂိုးဟု က
ယ်နှုတ်တော်မူဘီးဟာ သူရှစ်မြတ်နိုးတော်မူဟူ သားတော်ရဲ့
နိုင်ငံတော်ထဲဟို ခေါ်သွမ်းတော်မူဟယ်။

14 နို့လေဟာ အယ်သားတော်အားဖြင့် ဝီးနှုရှင်းဖြစ်ဟူ
ပြစ်လေ ခွမ်လွတ်ရှင်း ကျေးဇူးဟို ရရှိဂေဟယ်။

ခရစ်တော်ရဲ့ ဇာတိတော်န လောက်ဆောန်မှုကြောန်း

15 သားတော်ဟာ မျစ်စိန်မြင်နိုင်ဘဲဟူ ဘုရားသခင်ရဲ့
ပေါင်သဏ္ဌာန်တော်ဖြစ်ဘီး ဖန်ဆင်းတော်မူဟူ ဝေနေယျ
သတ္တဝါလေ ဂူလောင်းထဲမာ သားဦးဖြစ်ဟယ်။

16 ပြားဖြစ်ကြောန်းနူးဆိုဟာ ကောန်းဂန်ထတ်န မုလေ
ဂီးထတ်မာ ရှိဟူရာလေ ဂူလောင်းနတူးဒု လူမျစ်စိန် မြင်
နိုင်ဟူရာ၊ မြင်နိုင်ဘဲဟူရာ၊ ရာဇပလ္လင်လေဖြစ်ဖြစ်၊ စိုးရ
ဟူ တဂိုးလေဖြစ်ဖြစ်၊ ထွဋ်မြတ်ခွမ်အာဏာလေဖြစ်ဖြစ်

† 1:12 ၁.၁၂ ဝန်းသာဟူ စိန် ကျေးဇူးတော်ဟို ချီးမွမ်းဂေပါ၊
အယ်မျိုးမှတ်နေဟာ စိရှယ်သီးခံဘီး ဝန်းသာဟူ စိန် ချီးမွမ်းဂေပါ။
1:14 ၁.၁၄ ဧ ၁.၇

ရှိဟူမျှရာလေ ဂူလောင်းဟို့ ဘုရားသခင်ဟာ အယ်မူသား
တော်အားဖြင့် ဖန်ဆင်းတော်မူဟူကြောန့် ဖြစ်ဟယ်။ ရှိ
မျှဂူလောင်းဟာ အယ်သခင်အားဖြင့်န အယ်သခင်တွပ်
ဖန်ဆင်းတော်မူလေဟယ်။

17 သားတော်ဟာ ရှိမျှဂူလောင်း ဖြစ်ခန့်ဒဲဟု ရှိတော်မူ
ဘီး ရှိမျှဂူလောင်းဟို့လည်း တဂိုးတော်အားဖြင့် တည်နေ
ဂေဟယ်။

18 ကိုယ်တော်ဟာ သင်းတော်ဖြစ်ဟူ ကိုယ်ခန္ဓာရဲ့ ဦး
ခေါင်းဖြစ်တော်မူဟယ်။ ရှိမျှဂူလောင်းမာ ထူးမြတ်ဟူ
နဂိုမူလရင်းမြစ်ဖြစ်ဘီး သေဟားဟူ သူလေထဲမာ သားဦး
ဖြစ်တော်မူလေဟယ်။

19 ဖြားဖြစ်ကြောန့်နူးဆိုဟာ ဘုရားသခင်ဟာ ရှိမျှဂူ
လောင်း ပုလဲဇောင်ရှင်းလေဟို့ သားတော်ထဲမာ ကိန်းဝပ်
စေဟို့တွပ်န၊

20 လတ်ဝါးကပ်တိုင်ထတ်မာ သွန်းဟူ သားတော်ရဲ့ သွီး
တော်အားဖြင့်† ရန်ဟို့ ငြီးစေဘီး ကောန်းဂန်ဘောင်မာ ရှိ
ဟူ ဇာလေရော၊ မုလေဂီးထတ်မာ ရှိဟူ ဇာလေရော ဂူ
လောင်းဟို့ သားတော်အားဖြင့် သူန ပုလန်သင့်မြတ်လာ
စေဟို့တွပ် လိုတော်ရှိတော်မူဟယ်။

21 တခီဒူးဟု နန်းနို့လေဟာ ဆိုးညစ်ဟူကျင့်န ကြံစည်
လေကြောန့် ဘုရားသခင်န ဝီးကွာဟားဘီး စိန်လောင်း

1:18 ၁.၁၈ ဧ ၁.၂၂.၂၃ 1:20 ၁.၂၀ ဧ ၂.၁၆ † 1:20
၁.၂၀ သားတော်ရဲ့ သွီးတော်အားဖြင့်၊ အယ်မျိုးမူဘဲနေဟာ သားတော်ရဲ့
ယဇ်ပူဇော်ရှင်းန သေခံရှင်း အားဖြင့်။

နှိုက် ရန်သူဖြစ်စေဟုယ်။

²² အယ်ဘေမဲ့ ခုခီမာ သွီးသားနဆိုင်ဟူ ကိုယ်ခန္ဓာနှိုက် သားတော်ဟို့ သေခံစေရှင်းအားဖြင့် ဘုရားသခင်ဟာ နန်း နို့လေဟို့ သူန ပုလန်သင့်မြတ်စေတော်မူဟယ်။ အယ်မျိုး လောက်ရှင်းအားဖြင့် သန်ရှင်းဘီး ပြစ်မေ့ဘဲဟူ နန်းနို့လေ ဟို့ သူရဲ့ ရှေ့တော်မာ ဆစ်သနိုင်ဟို့တွပ် ဖြစ်ဟယ်။

²³ အယ်ဘေမဲ့ နန်းနို့လေဟာ ကြားနာရဟူ ကောင်းမြ တ်ဟူ ဒန်းကောင်းရဲ့ မျှော်လင့်ရှင်းဟုနေ ယီးယိုင်သွားဘဲ န ခိုင်းခိုင်မားမာ အပြစ်ခလဟားဟူ ယောင်ကြည်ရှင်းမာ ဆစ်ဘီးတည်နေရမယ်။ ကောင်းဂန်အော့-က်ဟု ဖန်ဆင်း ခံလောက တခုလောင်းဟို့ ပုလုံနို့နေဟူ အယ်မူဒန်းကော န်းဟို့ ဟောပြောစေခံနေဟူ သူဟာ ငါပေါလုဘဲ ဖြစ်ဟု ယ်။

ပေါလုရဲ့ မှုတော်ဆော်ဟူကြောင်း

²⁴ ငါဟာ နန်းနို့လေတွပ် ခံရဟူ ဆင်းရဲဒေါက်ခလေ ဟို့ ခု ဝန်းသာခံယူဘီး ခရစ်တော်ရဲ့ ဆင်းရဲဒေါက်ခ မာ လိုအပ်သေးဟူ ပိုင်းလေဟို့ ကိုယ်တော်ရဲ့ ကိုယ်ခန္ဓာ ဖြစ်ဟူ သင်းတော်တွပ် ကျန်ရှိနေဟူ ဆင်းရဲဒေါက်ခ ကြွင်းကျန်လေဟို့ ငါ့ရဲ့ ကိုယ်ခန္ဓာမာ ပုလုံဇောင်စေဟယ်။

²⁵ နန်းနို့ကျိုးတွပ် ဘုရားသခင်ဟာ ငါ့ဟို့ သင်းတော်ရဲ့ မှုဆော်ဖြစ် ခန့်ဟားဟယ်။ ငါ့ဟို့ ပေးအပ်တော်မူဟူ တာ ဝန်ဟာ စကားတော်ရှိဟူမျှ ပုလုံပုလုံဝဝဟို့ ဟောပြောဟို့ တွပ်ဖြစ်ဟယ်။

26 ကိုယ်တော်ဟာ အယ်မူ နတ်နဲဟူဇာလေဟို့ လောက
မာရှိဟူ လူလေ ဂူလောင်းဟို့ လွန်လာဘီးဟူ ရှေးကာလ
လေမာ သိခွမ်ပေးဘဲဟူလည်းဘဲ ခုခီမာ သူရဲသန်ရှင်းသူ
လေဟို့ ဖော်ပြပေးတော်မူဘိ။

27 လူမျိုးခြားလေမာ အယ်မူနတ်နဲရာနဆိုင်ဟူ မဟာ
စည်းဇိမ်ဟာ ဖယ်မျှလော့-က်ကီးဟယ် ဆိုဇာဟို့ သန်ရှ
င်းဟူသူလေ သိစေဟို့တွပ် ဘုရားသခင် လိုရှိတော်မူဟ
ယ်။ အယ်မူစည်းဇိမ်ဟာ ဖောင်းသရေတော်ဟို့ မျှော်လင်
ဟို့ကြောန်းဖြစ်ဟူ နန်းနို့ထဲမာ တည်တော်မူဟူ ခရစ်တော်
ဘဲဖြစ်ဟယ်။

28 နို့လေဟာ လူတိုင်းဟို့ ခရစ်တော်နှုက် စောင်လင်
ရင့်ကျတ်ဟူ သူဖြစ် ဆစ်သနိုင်ဟို့တွပ် လူတိုင်းဟို့ ဒိ
ပေး ဆောင်းမဘီးဟာ ဉာဏ်ပညာရှိဟူမျှန သွန်သန်ဘီး
ခရစ်တော်ရဲ့ ကြောန်းဟို့ ဟောပြောဂေပါဟယ်။

29 အယ်မူတာဝန်ဟို့ ငါကြိုးစား လောက်ဆောန်ဟူ ခီမာ
ခရစ်တော်ဟာ ငါ့ဟို့ ကီးမားဟူ တဂိုးဟို့ ပေးတော်မူဟ
ယ်။ အယ်မူတဂိုးဟာ ငါ့ထဲမာ လောက်ဆောန်နေဟယ်။

2

1 ငါဟာ နန်းနို့လေန လောဒိကိမြို့သူမြို့သားလေဟုနေ
စဘီး ငါ့ဟို့ မြင်ဖူးသေးဘဲဟူ တခြားလူလေတွပ် ဖယ်
လော့-က်ထိ ကြိုးစားဘီး လောက်ဆောန်ဟူဇာလေဟို့
နန်းနို့လေဟို့ သိစေရှင်ပါဟယ်။

² အယ်မျိုး ကြိုးစားဘီး လောက်ဆောန်ရဟူကြောင်းဟု နန်းနို့လေ ဂူလောင်းဟာ စိအားထတ်သန်ဘီး ရှင်းရှင်း တယော့-က်ဟို့တယော့-က် ရှစ်ရှင်းမြစ်တာန စည်းလောင်း စေဟို့တွပ် စစ်မှန်ဟူ သိနားလည်မှုအားဖြင့် စိခလမှု အာမခံချစ်ဟို့ ပုလဲပုလဲဝဝ ရရှိဂေဟို့တွပ်န၊ ဘုရားသခင် ရဲ့ လျှို့ဝှပ်နတ်နဲဟူရာဖြစ်ဟူ ခရစ်တော်ဟို့ သိရဂေဟို့ တွပ် ဖြစ်ဟယ်။*

³ အယ်မူခရစ်တော်ထဲမာ ဘုရားသခင်ရဲ့ ဉာဏ်ပညာ ဘဏ္ဍာ၊ သိပညာဘဏ္ဍာရှိဟူမျှဟို့ ဝှက်ဟားတော်မူဟယ်။

⁴ အယ်ကြောန့် ဖယ်သူလည်း နန်းနို့လေဟို့ ပြားရောင်း ဟူ စကားလေန လှည့်ဇားစေန။

⁵ ငါဟာ ကိုယ်ခန္ဓာအားဖြင့် နန်းနို့လေန ကွာဘီးနေရဟူ လည်းဘဲ စိဝိညာဉ်အားဖြင့် နန်းနို့လေနတူးဒူရှိပါဟယ်။ နန်းနို့လေဟာ တစည်းတလောင်းဒဲရှိဂေဘီး ခရစ်တော်ဟို့ ခိုင်းခိုင်မြဲမြဲန ယောင်ကြည်ဂေဟူဇာဟို့ ငါမြင်ရဟူကြော နဲ့ ရရာတိုင်းဘဲ ဝန်းသာပါဟယ်။

ခရစ်တော်နှိုက် ကြွယ်ဝဟူဘဝကြောင်း

⁶ အယ်ကြောန့် နန်းနို့လေဟာ ခရစ်တော် ယေရှုဟို့ သခင်ဖြစ်န လတ်ခံဂေဟူကြောန့် ကိုယ်တော်န တလောင်း တဝဒဲ ဖြစ်ရှင်းအားဖြင့် သတ်ရှင်ဂေပါ။

* 2:2 J-J ဘုရားသခင်ရဲ့ လျှို့ဝှပ်နတ်နဲဟူရာဖြစ်ဟူ ခရစ်တော်ဟို့ သိရဂေဟို့တွပ် ဖြစ်ဟယ်။ တချို့ မူရင်းလတ်ရေးမူလေမာ ဘုရားသခင်ရဲ့နတ်နဲဟူရာ၊ တချို့လေမာ ခရစ်တော်ရဲ့ ဖ ဘုရားသခင်ရဲ့ နတ်နဲဟူရာ၊ တချို့လေမာ ခရစ်တော်န ဖ ဘုရားသခင်ရဲ့ နတ်နဲဟူရာ၊ ဆိုဘီး ပါရှိဟယ်။

7 သွန်သန်ဇာလေဟို ခံရဟူတိုင်း ကိုယ်တော်နှိုက် နတ်
နတ်နဲနဲ ပြစ်စွဲဘီးဟာ ကိုယ်တော်ထတ်မာ ကိုယ့်ရဲ့ ဘဝ
သတ်တာဟို တည်ဆော့-က်ဘီး နန်းနို့လေရဲ့ ယောင်
ကြည်မှု ခိုင်မြဲစေရှင်းအားဖြင့် ကျေးဇူးတော် ချီးမွမ်းရှင်း
န ပုလဲဇောင်ဂေ့ပါ။

8 ခရစ်တော်ရဲ့ တရားဟို ခြေပြုဘဲန လောကရဲ့ ခြေ
ခံတရားလေ လူလေရဲ့ ဓလေ့ထောင်းဒမ်းလေဟို ခြေပြု
ဟားဟူ တွေးခေါ်ပညာလေန နှစ်သာရမေ့ဘဲဟူ လှည့်ဇား
မှုလေအားဖြင့် ဖယ်သူလည်း နန်းနို့လေဟို လုယူဖျစ်ဆီး
ဘဲနေဟိုတွပ် ဒိပြုဂေ့ပါ။

9 ဖြားဖြစ်ကြောနန်းဆိုဟာ ဘုရားရဲ့ ဇာတိတော်ရဲ့ ရှိဟူ
မျှ ပုလဲဇောင်ရှင်းလေဟို ခရစ်တော်ထဲမာ ကိုယ်ထန်ရှား
ဘီး ကိန်းဝပ်တော်မူလေဟယ်။

10 နန်းနို့လေဟာ အောက်ချောက်ရှင်း ခွမ့်အာဏာဂူ
လောင်းရဲ့ ဦးခေါင်းဖြစ်တော်မူဟူ အယ်သခင်အားဖြင့် ပု
လဲဇောင်ဂေ့ဟယ်။

11 ခရစ်တော်နဆိုင်ဟူ ရေဖျားလှီးရှင်းအားဖြင့် သွီးသား
ဇာတိနဆိုင်ဟူ ကိုယ်ခနုဇာဟို ခလွတ်ပယ်ဘီးဟာ လူ
အားဖြင့်မှုဘဲဟူ ရေဖျားလှီးရှင်းဟို အယ်သခင်နှိုက် ခံ
ယူဂေ့ဟယ်။

12 နန်းနို့လေ ဗတုတိဇံခံဟူ ဇာအားဖြင့် ကိုယ်တော်န
တူးဒူ သဂြိုဟ်ဇာဟို ခံဂေ့ဘီး ခရစ်တော်ဟို သေရှင်းဟ

နေ ရှင်ပုလန်ထမြော့-က်စေတော်မူဟူ ဘုရားသခင်ရဲ့ တ
ဂိုးတော်ဟို့ ယောင်ကြည်ဂေဟူကြောန့် ကိုယ်တော်နတူးဒု
ရှင်ပုလန်ထမြော့-က်ဂေလေဟယ်။

13 နန်းနို့လေဟာ စဟု ပြစ်ကျူးလွန်ဟူ သူလေဖြစ်ဂေ
ဘီး ကိုယ်ကာယရဲ့ ရေဖျားလီးဘဲဟူ ဖြစ်န သေနေဟူ နန်း
နို့ဟို့ ဘုရားသခင်ဟာ ခရစ်တော်နတူးဒု သတ်ရှင်စေတော်
မူဘီးဟာ နို့လေကျူးလွန်ဟူ ပြစ်ရှိဟူမျှဟို့ ခွမ်လွတ်ဘီး၊

14 နို့လေရဲ့ ပြစ်ကြွေးစာရင်းန၊ အယ်ပြစ်စာရင်းနဆိုင်
ဟူ ဥပဒေစည်းမျဉ်းလေ ဂူလောင်းဟို့ လတ်ဝါးကပ်တိုင်
မာ ရိုက်ရှင်းအားဖြင့် ပယ်ဖျစ်တော်မူလေဟယ်။

15 အယ်လတ်ဝါးကပ် တိုင် ထတ်မာ ခရစ်တော်ဟာ
ဝိညာဉ်ရေးရာနဆိုင်ဟူ တဂိုးရှင်လေန ခွမ်အာဏာရှိဟူ
မျှဟို့ ဖယ်ရှားတော်မူဘီးဟာ† သူးနို့လေဟို့ စစ်သုံးပန်း
ဖြစ် ဖမ်းဆီးခေါ်ဘီး အောင်ပွဲခံ လှည့်လည်ရာမာ လူလေ
ဂူလောင်းဟို့ ပြဟို့တွပ် နှော့-က်ဟုနေ လိုက်ပါစေတော်မူ
လေဟယ်။

16 အယ်ကြောန့် စားသော့-က်န ပတ်သတ်ဟူ ဇာဘဲ
ဖြစ်ဖြစ်၊ ဘာသာရေးပွဲနေ၊ လဆန်းနေ၊ ဒန်းနေန ပတ်
သတ်ဇာဘဲဖြစ်ဖြစ် နန်းနို့လေဟို့ ဖယ်သူလေဟုလည်းဘဲ
စီရင်စေန။

2:13 ၂.၁၃ ဧ ၂.၁-၅ 2:14 ၂.၁၄ ဧ ၂.၁၅ † 2:15 ၂.၁၅
ခရစ်တော်ဟာ ဝိညာဉ်ရေးရာနဆိုင်ဟူ တဂိုးရှင်လေန ခွမ်အာဏာရှိဟူမျှဟို့
ဖယ်ရှားတော်မူဘီးဟာ၊ အယ်မျိုးမှုဘဲနေဟာ ခရစ်တော်ဟာ ဝိညာဉ်ရေးရာ
အောက်ချောက်မားလေန အာဏာပိုင်လေဟို့ ဖယ်ရှားတော်မူလေဟယ်။

2:16 ၂.၁၆ ရော ၁၄.၁-၆

17 အယ်မူဇာလေဟာ နှော-က်တခီမာ ဖြစ်ပေါ်လာမယ့် ဇာလေရဲ့ ရံရောန်မျှဘဲဖြစ်ဘီး ကိုယ်စစ်ဟု ခရစ်တော်ဘဲ ဖြစ်ဟယ်။

18 မှန်ဘဲဟူ နှိခိုလမှုလေ၊ ကောန်းဂန်တမန်လေဟို ဝတ်ပြုကိုးကွယ်မှုလေဟို လေးနတ်ပြောဆိုဘီး သူးနှိတို့မြ င်ရဟူ ဗျာဒိတ်ရူပါရောင်လေဟို ကြောန်းပြုဘီးဟာ သူးနှိ ဟု တခြားသူလေထတ် သာဟယ်ဆိုဘီး ပြောဆိုတတ်ဟူ သူလေဟာ နန်းနှိလေဟို ရှုံ့ခလဟူခွမ်ဟို ပေးဂေန်။ သူး နှိလေဟာ လူသဘောအားဖြင့် စဉ်းစားဆင်ခြင်ဘီး ချည်း နှီးသတ်သတ် စိဘဝင်မြင့်နေဂေဟယ်။

19 သူးနှိလေဟာ ကိုယ်ခန္ဓာရဲ့ ဦးခေါင်းဖြစ်ဟူ ခရစ် တော်ဟို မှီခိုအားကိုးမှု မှေ့ဂေဟူ။ ခရစ်တော်ရဲ့ ထီးသီး မှုအော့-က်မာ ဆစ်လေန ရိုးရှင်းဆစ်ပေးဟူ ရွတ်လေ အားဖြင့် ကိုယ်ခန္ဓာ တခုလောင်းဟာ အဟာရဟိုခံယူဘီး ဘုရားသခင် လိုတော်ရှိဟူတိုင်း ကီးထွားတတ်လေဟယ်။

ခရစ်တော်နတူးဒူ သေရှင်းန သတ်ရှင်ရှင်းကြောန်း

20 နန်းနှိလေဟာ ခရစ်တော်နတူးဒူ သေပီးဟာ အယ် လောကရဲ့ ခြေခံတရားဟုနေဘီး ကင်းကွာဟယ် ဆိုဟာ ပြားဖြစ်ကြောန့် လောကမာ သတ်ရှင်ဟူမျိုး၊

21 “ထိန်” “ကိုင်န” “မြန်” ဆိုဟူ စည်းမျဉ်းလေဟို လိုက်နာနေဂေနှူး။

22 အယ်မူရာ ဂူလောင်းဟာ လူလေရဲ့ ပညတ်န သွန်သန် ချစ်လေ ဖြစ်ဟူကြောန့် သောင်းပြုရင်းန ပျော-က်ကွယ် ပျစ်စီးဟူးမယ့် ရာလေဘဲဖြစ်ဟယ်။

23 အယ် မျိုး ဘာသာတရား စည်းမျဉ်း လေ ဟာ ကိုယ်ခန္ဓာကျိုးန ဆိုင်ဘဲ ကိုယ်လိုလျောက် ကိုးကွယ် ဟူဇာလေ၊ မှန်ဘဲဟူ စိန်ခွဲလဟူဇာလေ၊ ကိုယ်ကာယဟို့ နှိ စစ်ဟူဇာလေန ပတ်သတ်ဘီး ပညာရှိဟန်ပေါ်ဟူလည်းဘဲ သွီးသားဇာတိရဲ့ တတ်မတ်မှုဟို့ ချောက်တီးရာမာ ဖယ် မျိုးလည်းကျိုးပြုဟု။

3

1 အယ်မျိုးဖြစ်ကြောန့် နန်းနို့လေဟာ ခရစ်တော်နတူးဒု ထမြော-က်ဂေဟယ် ဆိုဟာ ဘုရားသခင်ရဲ့ ညာဖတ်မာ ထိုင်တော်မူဟူ ခရစ်တော်ရှိဟူနေရာ ထတ်ရပ်မာရှိဟူဇာ လေဟို့ ရှာဂေပါ။

2 လောကမာ ရှိဟူရာလေဟို့ စိစွဲလန်းဘဲန ထတ်ရပ်မာ ရှိဟူရာလေဟို့ဘဲ စိစွဲလန်းဂေပါ။

3 ဖြားဖြစ်ကြောန့်န့ဆိုဟာ နန်းနို့လေဟာ သေဘီးဟူ သူလေ ဖြစ်ဟူကြောန့် နန်းနို့သတ်ဟာ ခရစ်တော်နတူးဒု ဘုရားသခင်နှိုက် ဝှပ်ဟူးဟူကြောန့် ဖြစ်ဟယ်။

4 နန်းနို့ရဲ့ သတ်ဖြစ်ဟူ ခရစ်တော်ဟာ ထန်ရှားတော်မူ ဟူ ခီမာ နန်းနို့လေလည်း အယ်သခင်နတူးဒု ဖောင်းကီး ဘီး ထန်ရှားလာလေ့မယ်။

ဘဝဟောင်းန ဘဝသစ်ကြောင်း

5 အယ် ကြော နဲ့ ကာမ ဂေါ င် လိုက်စား ရှင်း လေ၊ ကိလေသာ ပူပန်ရှင်း လေ၊ ညစ်ညူး ရှင်း လေ၊ ရောက် ထုဟို့ ကိုးကွယ်ရှင်းဖြစ်ဟူ လောဘလွန်ကျူးရှင်းလေဟို့ မှလေဂီးထတ်မာရှိဟူ နန်းနို့ရဲ့ ကိုယ်အင်္ဂါလေဟို့ သေစေ ဂေ့ပါ။

6 အယ်မာမျိုးလေကြောနဲ့ ဘုရားသခင်ရဲ့ မျစ်တော်ဟာ ငြင်းဆန်ဟူ သူလေထတ်ဟို့* သတ်ရော-က်လေဟယ်။

7 စဟ နန်းနို့လေလည်း အယ်သူလေန ပေါန်းဖော်ဒူးဟု အယ်မူရာလေအားဖြင့် ကျင်လည်သတ်ရှင်ဂေ့ဟယ်။

8 အယ်ဘေမဲ့လည်း ခုခီမာ နန်းနို့လေဟာ မျစ်ထွပ်ရှင်း လေ၊ စိဆိုးရှင်းလေ၊ မူးတီးရှင်းလေ၊ သူများရဲ့ အသရေ ဖျစ်ရှင်းလေ၊ ညစ်ညူးဟူစကား ပြောဆိုရှင်းလေဟို့ နန်း နို့လေရဲ့ နှောက်ဟုနော့ဘီး ဖယ်ရှားဂေ့ပါ။

9 ယော့-က်ဟို့ယော့-က် မုသာသောင်းဂေ့န။ ဖြားဖြစ် ကြောနဲ့နူးဆိုဟာ နန်းနို့လေဟာ လူဟောင်းရဲ့ကျင့်လေန လူဟောင်းရဲ့ကိုယ်ဟို့ ခလွတ်ပယ်ဘီးဟာ၊

10 ဖန်ဆင်းတော်မူဟူသူရဲ့ ပေါင်သဏ္ဌာန်တော်နညီ မှန် ဟူသိပညာအားဖြင့် သစ်ပြုပြင်ဟူ လူသစ်ဟို့ ယူတန်ဝတ် ဆောန်ဟူသူလေ ဖြစ်ဂေ့လေဟယ်။

11 အယ်မူ ဖန်ဆင်းတော်မူဟူထဲမာ လူမျိုးခြားမေ့ဟု၊

* 3:6 ၃.6 တချို့ မူရင်းလတ်ရေးမူလေမာ ငြင်းဆန်ဟူ သူလေထတ်ဟို့ ဆိုဘီး မေ့ဟု။ 3:9 ၃.၉ ဧ ၄.၂၂ 3:10 ၃.၁၀ ဧ ၄.၂၄

ယုဒလူမျိုးဟု၊ ရေဖျားလှီးဟူးသူန လှီးဟူးဘဲဟူသူမျိုး
ဟု၊ ယဉ်ကျေးဘဲဟူသူမျိုးဟု၊ လူရိုင်းမျိုးဟု၊ ကျွန်မျိုးဟု၊
ကျွန်မူဘဲဟူလူမျိုးဟု၊ ခရစ်တော်ဟု လောင်းဇောင်ထဲဟု
လောင်းဇောင် ဖြစ်တော်မူလေဟုယ်။

12 အယ်ကြောန့် နန်းနို့လေဟာ ဘုရားသခင် ဝီး
ကော့-က်ဟူသူ၊ သန့်ရှင်းဟူသူ၊ ရှစ်အပ်ဟူ သူမျိုးဘဲ
သနားစောင့်မတ်ရှင်း၊ ကျေးဇူးပြုရှင်း၊ စိန်ခွဲလှရှင်း၊ နူးညံ့
သိမ့်ရှင်း၊ စိရယ်ရှင်းလေဟို ဝတ်ဆင်ဂေပါ။

13 ရှင်းရှင်းလေရဲ့ပြစ်ဟို သီးခံဘီး ယော့-က်နယော့-က်
ပြစ်တန်ဇာရှိဟုယ် ဆိုဟာ သခင်ဘုရားဟာ နန်းနို့လေရဲ့
ပြစ်ဟို ခွမ်လွတ်ဟူမျိုး နန်းနို့လေလည်း ရှင်းရှင်း ခွမ်လွတ်
ဂေပါ။

14 အယ်မူဇာဂူလောင်းထတ်မာ စောင်လင်ဟူ ဖွဲ့စည်းဖြစ်
ဟူ ရှစ်ရှင်းမြစ်တာဟို ထပ်ဘီးဟာ ယူတန်ဝတ်ဆာန်
ဂေပါ။

15 နန်းနို့လေရဲ့ စိန်လောင်းထဲမာ ခရစ်တော်ရဲ့ ငြိသတ်
ရှင်း အောက်စိုးစေ။ ဖြားဖြစ်ကြောန့်နူးဆိုဟာ နန်းနို့လေ
ဟာ အယ်မူငြိသတ်ရှင်း ခံစားရဟိုတွပ် ကိုယ်ခန္ဓာ တခုဒဲ
ထဲဟို ခေါ်ဟူးတော်မူရှင်းဟို ခံရဟူကြောန့် ကျေးဇူးသိ
တတ်ဟူ စိရှိဂေပါ။

16 ခရစ်တော်ရဲ့ စကားတော်ဟာ ပညာဘောင်းဇောင်န
နန်းနို့ထဲမာ ကြွယ်ဝဘီး တည်နေဟူကြောန့် နန်းနို့လေဟာ

ဆာလံချင်းဟုနေစဘီး ဓမ္မချင်း၊ ဝိညာဉ်ရေးရာ ချင်းဘော
န်းဇောင်အားဖြင့် ရှင်းရှင်းလေဟို ဒီပေးဆောင်းမ သွန်သန်
ဘီး နူးညွတ်ဟူ စိန်လောင်းန ဘုရားသခင် ရှေ့တော်မာ
တင့်တယ်လျောက်ပတ်အော်န် ချီးမွမ်းဂေပါ။

¹⁷ စကားပြောရှင်းဖြစ်စေ၊ မှုဆော်န်ရွက်ရှင်းဖြစ်စေ
သခင်ယေရှုရဲ့ နာမတော်ဟို့ ထော့-က်ဘီး ရှိမျှဂူလောင်း
ဟို့ လောက်ဘီးဟာ ကျေးဇူးတော် ကီးလှပါဟယ် ဆိုဘီး
အယ်သခင်ဟို့ မှီပြုဘီးဟာ ဖဘုရားသခင်ရှေ့မာ ကျေးဇူး
တော်ဟို့ ချီးမွမ်းဂေပါ။

ခရစ်ယာန်မိသားစုရဲ့ တာဝန်ကြောန်း

¹⁸ မယားဖြစ်ဟူသူလေ၊ သခင်ဘုရားနှိုက် လျောက်ပ
တ်ဟူတိုင်း ကိုယ့်လန်ရဲ့ အောက်စိုးမှုဟို့ ဝန်ခံဂေပါ။

¹⁹ လန်ယော့-က်ကျားလေ၊ ကိုယ့်ရဲ့မယားဟို့ ရှစ်ဂေပါ။
ကြမ်းကြမ်းထန်းထန်း လောက်ဂေန။

²⁰ သားမီးလေ၊ မိဖစကားဟို့ ရာရာမာ နားထောန်ဂေပါ။
မိဖစကားဟို့ နားထောန်ဟူဇာဟာ သခင်ဘုရား နှစ်သက်
တော်မူဟူဇာ ဖြစ်ဟယ်။

²¹ မိဖလေ၊ ကိုယ့်သားမီးလေဟို့ စိဆိုးအော်န် ပြုဂေန။
အယ်မျိုးပြုဟယ် ဆိုဟာ သူးနှိလေဟာ အားလျော့စိပျစ်
ဂေလေမယ်။

3:18 ၃.၁၈ ဧ ၅.၂၂: ၁ ပေ ၃.၁ 3:19 ၃.၁၉ ဧ ၅.၂၅: ၁ ပေ ၃.၇

3:20 ၃.၂၀ ဧ ၆.၁ 3:21 ၃.၂၁ ဧ ၆.၄

22 စေခံဟူကျွန်လေ၊ နန်းနို့လေရဲ့ လောက်သခင်လေ
ဟို့ ရာရာမာ နာခံဂေပါ။ မျစ်နှာလိုမျစ်နှာရ လောက်ဟူသူ
လေမျိုး မျစ်မော့-က်မာဘဲ လောက်ဆောန်ရှင်းမျိုးမှုဘဲ
န သခင်ဘုရားဟို့ ကြော့-က်ရွံ့ဘီး ရိုးသားဟူ စိန်လောင်း
အားဖြင့် နာခံဂေပါ။

23 လူလေရဲ့ မှုဟို့ဘဲ လောက်ဆောန်ဟူမျိုးမှုဘဲန
သခင်ဘုရားရဲ့မှုတော်ဟို့ လောက်ဆောန်ဟူမျိုး ရာရာဟို့
စေတနာစိန် လောက်ဂေပါ။

24 နန်းနို့လေဟာ သခင်ခရစ်တော်ရဲ့ စေခံဟူသူလေဖြ
စ်ဟူကြောန့် မွီတော်ဖြစ်ဟူ ကျိုးဟို့ အယ်သခင်ဘုရားရဲ့
လတ်တော်ဟု ခံရလေ့မယ် ဆိုဘီး သိမှတ်ဂေပါ။

25 တရားဘဲဟူမှုဟို့ ပြုဟူသူဟာ ကိုယ်ပြုဟူမှုရဲ့ ကျိုး
ဖြစ်ဟို့ ခံရလေ့မယ်။ ဖယ်သူဟို့လည်း မျစ်နှာလိုက်တော်
မှုဟူ။

4

1 သခင်ဖြစ်ဟူသူလေ၊ နန်းနို့လေရဲ့သခင်ဟာ ကောင်း
ဂန်ဘောင်မာ ရှိတော်မူဟယ် ဆိုဇာဟို့ သိမှတ်ဘီး ပြောန့်မ
တ်ဟူတရားတိုင်း မှန်ကန်မျှတမှုအားဖြင့် ကိုယ့်ကျွန်လေ
ဟို့ ပြုဂေပါ။

ညွှန်ကြားချစ်လေကြောန့်

2 ဆုတောင်းရှင်းဟို့ မြဲဒမ်းပြုဘီး ကျေးဇူးချီးမွမ်းရှင်း
အားဖြင့် ဒီဝိရိယရှိဂေပါ။

3 ဘုရားသခင်ဟာ စကားတော်တွင် ခွဲဗော့-က်ဟို့ ဖွဲ့မံ ပေးဟူးဘီး ခရစ်တော်ရဲ့ နတ်နဲဟူရာလေဟို့ ဟောပြောနို့ င်ဟို့ နို့လေတွပ်လည်း ဆုတောင်းပေးဂေ့ပါ။ ငါဟာ အယ် မူနတ်နဲဟူရာလေကြောနို့ ထောန်ကုလနေပါဟယ်။

4 အယ်မူနတ်နဲဟူရာဟို့ ဟောပြောသင့်ဟူတိုင်း ရှင်းရှင်း လန်းလန်း ပြတ်ပြတ်သားသားန ငါဟောပြောနိုင်ဟို့တွပ် ဆုတောင်းဂေ့ပါ။

5 ယောင်ကြည်ဘဲဟူသူလေရှေ့ မာ ဉာဏ်ပညာရှိရှိန ကျင့်ဆောက်ဘီးဟာ ခီခါဟို့ ကောင်းကောင်းသောင်းဒုလ ဂေ့ပါ။

6 လူသီးသီးဟို့ ဖယ်မျိုး ပုလန်ပြောရမယ်ဆိုဇာဟို့ သိနို့ င်ဟို့တွပ် နန်းနို့လေပြောဟူစကားဟာ ဆားဟူမျိုး ရသာရှိ ဟို့တွပ် မြဲဒမ်းမျစ်နာသာရဘီး တင့်တယ်မူရှိပါစေ။

နော့-က်ဆောင်း နှောက်ဆစ်ဟူကြောင်း

7 သခင်ဘုရားနှိုက် သစ်စာရှိဟူ မူဆောက်၊ နို့လေရဲ့ လောက်ဖော်ဆောက်ဖတ်ဖြစ်ဟူ ငါရှစ်ရဟူညီ တုခိတ်ဟာ ငါနဆိုင်ဟူ ကြောင်းရာရှိဟူမျှဟို့ နန်းနို့လေဟို့ ပြောပြလေ့ မယ်။

8 သူဟို့ နန်းနို့နားဟို့ လွတ်လိုက်ဟူကြောင်းရာဟု နို့လေ ရဲ့ကြောင်းဟို့ နန်းနို့သိရဟို့တွပ်န သူဟာ နန်းနို့လေရဲ့စိန် လောင်းဟို့ နှစ်သိမ့်အားပေးဟို့တွပ် ဖြစ်ဟယ်။

9 နန်းနို့ထဲဟု တယော့-က်ဖြစ်ဟူ၊ သစ်စာရှိဟူသူ နို့လေ

ရှစ်ရဟူညီ ဩနေသိမ်လည်း သူ့နတူးဒုပါလာဟယ်။ သူ့နို့လေဟာ အယ်ရပ်မာဖြစ်ပျစ်နေဟူ ကြောန်းရာလေ ဂူလောင်းဟို့ နန်းနို့လေဟို့ ပြောပြလေ့မယ်။

10 ငါနတူးဒု ချောက်ကုလခံနေရဟူ အာရိတုတာခု၊ ဗာနဗရဲ့တူ မာကုဟားလေဟာ နန်းနို့လေဟို့ နှောက်ဆစ်လိုက်ပါဟယ်။ သူဟာ နန်းနို့နားဟို့ရော့-က်လာဟူ ခီမာ ကြုံဆိုဂေ့ဟို့တွပ် ညွန်ကြားဟူဇာလေဟို့ နန်းနို့ရဂေ့ပီးဘီ ဖြစ်ဟယ်။

11 ယုတုတုဆိုဘီးခေါ်ဟူ ယေရှုဟုလည်း နန်းနို့လေဟို့ နှောက်ဆစ်လိုက်ပါဟယ်။ ရေဖျားလှီးဟားဟူသူလေထဲမာ အယ်လူသောင်းယော့-က်ဟာ ဘုရားသခင်ရဲ့ နိုင်ငံတော်တွပ် ငါ့ရဲ့ လောက်ဖော်ဆောန်ဖတ်ဖြစ်ဟူ ယုဒလူမျိုး ယောင်ကြည်သူလေဖြစ်ဘီး၊ ငါ့ဟို့ နှစ်သိမ့်အားပေးဟူသူလေ ဖြစ်ဟယ်။

12 နန်းနို့လေထဲဟုဖြစ်ဟူ ယေရှုခရစ်တော်ရဲ့ကျွန် ပေဖြဟာ နန်းနို့ဟို့ နှောက်ဆစ်လိုက်ပါဟယ်။ နန်းနို့လေဟာ စောင်လင်ရင့်ကျတ်ဘီး၊ ဘုရားသခင်ရဲ့လိုတော်ဟို့ ကူစင်အောန် လောက်ဆောန်နိုင်ဟို့တွပ် သူဟာ နန်းနို့တွပ် ခီတိုင်းမာ ကြိုးစားဘီးဟာ ဆုတောင်းတတ်ပါဟယ်။

13 မှန်တကယ်ဘဲ သူဟာ နန်းနို့လေဟုနေစဘီး လောဒိကံမြို့န ဟေရပေါလံမြို့မရှိဟူ သူလေတွပ် ရရာတိုင်း

ကြိုးစားလောက်ဆောန်ဟယ် ဆိုဇာဟို ငါသတ်သေခံပါ
ဟယ်။

14 နို့လေရှစ်ရဟူ ဆေးဆရာလုကာန ဒေမဟာ နန်းနို့
လေဟို နှောက်ဆစ်ဂေ့ဟယ်။

15 လောဒိကိမြို့ဟ ညီကိုလေဖြစ်ဟူ၊ နို့ဖန သူ့အီမာရှိ
ဟူ သင်းတော်*ဟိုလည်း နှောက်ဆစ်ဂေ့ပါ။

16 အယ်စာဟို နန်းနို့လေဖတ်ဘီးမှ လောဒိကိမြို့မာရှိဟူ
သင်းတော်ဟိုလည်း ဖတ်စေဂေ့ပါ။ အယ်မြို့ဟရဟူ စာ
ဟိုလည်း နန်းနို့လေ ဖတ်ဂေ့ပါ။

17 အာခိပုပုဟို “သခင်ဘုရား ပေးအပ်ခံရဟူ ဓမ္မဆရာ
ရဲ့ မှုတ်ဟို ဆောင်းထိ ပုလဲဇောင်အောန် လောက်ဆော
န်ပါ” ဆိုဘီး ပြောဂေ့ပါ။

18 ငါပေါလုဟာ နန်းနို့တွပ် အယ်နှောက်ဆစ်စကားဟို
ငါ့လတ်န ရေးလိုက်ပါဟယ်။ ငါခံရဟူ တောက်နှောန်ရှင်း
ဟို အော့-က်မေ့ဂေ့ပါ!

နန်းနို့လေမာ ဘုရားသခင်ရဲ့ ကျေးဇူးတော်ရှိပါစေ။

4:14 ၄.၁၄ က ၂ တိ ၄.၁၁: ဖိလေ ၂၄: ၁ ၂ တိ ၄.၁၀: ဖိလေ ၂၄ * 4:15
၄.၁၅ နို့ဖန သူ့အီမာရှိဟူ သင်းတော်၊ တချို့ မူရင်းလတ်ရေးမူလေမာ နို့ဖန
သူ့အီမာရှိဟူ သင်းတော်၊ ဆိုဘီး ပါရှိဟယ်။ 4:17 ၄.၁၇ ဖိလေ ၂

ဓမ္မသစ်ကျမ်း ထားဝယ်ဘာသာစကား
The Holy Bible in the Tavoyan language of
Myanmar: ဓမ္မသစ်ကျမ်း ထားဝယ်ဘာသာစကား

copyright © 2024 The Word for the World International

Language: (Tavoyan)

Contributor: The Word for the World International

ထားဝယ် ဓမ္မသစ်ကျမ်း

The New Testament in Dawei Language

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

0c63f106-1001-58e4-ad11-6f62c327c4e1